

四庫全書

史部

欽定四庫全書

史部

歷代名臣奏議卷二十九

詳校官檢討<sub>臣</sub> 朱依昊

編修<sub>臣</sub> 裴謙覆勛

總校官編修<sub>臣</sub> 王燕緒

校對官侍讀<sub>臣</sub> 王家賓

謄錄監生<sub>臣</sub> 沈希曾

欽定四庫全書

歷代名臣奏議卷二十九

明

楊士奇等撰

治道

唐文宗嘗曰朕觀晉君臣以夷曠到傾覆當時卿大夫過邪中書侍郎李石對曰然古詩有之人生不滿百常懷千歲憂畏不逢也晝短苦夜長闇時多也何不秉燭遊勸之照也臣願捐軀命濟國家惟陛下鑒照不惑則

安人疆國其庶幾乎

上嘗自謂臨天下十四年雖未致治然視今日承平亦希矣同中書門下平章事李珣曰為國者如治身及身康寧調適以自助如恃安而忽則疾生天下當無事思所闕禍亂何至哉

後唐明宗時大理少卿康澄上疏言時事曰為國家者有不足懼者五深可畏者六三辰失行不足懼天象變見不足懼小人訛言不足懼山崩川竭不足懼水旱蟲

蝗不足懼也賢士藏匿深可畏四人遷業深可畏上下相徇深可畏廉恥道消深可畏毀譽亂真深可畏直言不聞深可畏也不足懼者願陛下存而勿論深可畏者願陛下修而靡忒上優詔獎之

上方務聽納史館脩撰張昭上疏曰臣聞安不忘危治不忘亂者先儒之丕訓靡不有初鮮克有終者前經之至戒究觀列辟莫不以驕矜怠惰有虧盛德恭惟太宗貞觀之初玄宗開元之際焦勞庶政以致太平及國富

兵消年高志逸乃忽守約之道或貽執簡之譏陛下以  
慈儉化天下以禮法檢臣鄰絀姦邪之黨延正直之論  
務遵純儉以節浮費信賞必罰至公無私其創業垂統  
之規如貞觀開元之始願陛下有始有終無荒無怠臣  
又伏念保邦之道有八審焉願為陛下陳之夫委任審  
於材器聽受審於忠邪出令審於煩苛興師審於德力  
賞罰審於喜怒毀譽審於愛憎議論審於賢愚嬖寵審  
於姦佞推是八審以決萬機庶可以臻至治明宗覽之

稱善

後周世宗方切於治道集賢殿學士竇儼上疏曰歷代  
致理六綱為首一曰明禮禮不明則彛倫不序二曰崇  
樂樂不崇則二儀不和三曰熙政政不熙則羣務不整  
四曰正刑刑不正則巨姦不懾五曰勸農農不勸則資  
澤不流六曰經武武不經則軍功不盛故禮有紀若人  
之衣冠樂有章若人之喉舌政有統若人之性情刑有  
制若人之呼吸農為本若人之飲食武為用若人之手

足斯六者不可斯須而去身也陛下思服帝猷寤寐獻  
納亟下方正之詔廓開藝能之路士有一技必得自効  
故小臣不揆輒陳禮樂刑政勸農經武之言世宗多見  
聽納

宋太宗太平興國七年知相州田錫上疏曰臣備位諫  
垣出官河朔雖勵忠勤之節未伸謇諤之誠尸位自知  
傍徨益切何以分陛下憂勤之寄何以副朝廷委用之  
恩敢不夙夜有思涓埃欲効願以芻蕘之見上希英聖



之知今陛下命以頒條委之理郡親民之心無先於此  
苟若所理之郡事簡獄空所親之民風淳俗厚所謂蒞  
民有術御下有能足以副朝廷任用之恩有以彰陛下  
憂勤之旨然事有無從而得簡獄有無因而久空民風  
未至於淳和物俗未臻於富厚雖有蒞民之術無得而  
施雖有御下之方無從而設況臣闇懦御下非才以臣  
愚蒙蒞民無術但可言其久弊恤其未安久弊者昔近  
并門鄰於敵境備邊之費禦寇之兵二十餘年民不遑

息未安者今以北狄通於塞垣屯兵禦戎飛芻輓粟三十餘郡民不甚豐筦榷貨財網利太密躬親機務綸旨稍頻臣所謂網利太密者酒麴之利但要增盈商稅之利但求出剩或偶有出剩不詢出剩之由或偶有虧欠必責虧欠之過逐年比撲只管增加遞月較量不管欠折然國家軍兵數廣支用處多課利不得不如此征收筦榷不得不如此比較窮盡取財之路莫甚於茲疏通殖貨之源未聞適變似不知止殊無定期今乞國家以

關市之征定其常數酒麴之利授以常規或偶有增加不更求出剩或偶有虧折即可令於出剩時補填且如州縣征科農桑稅賦年豐則未聞加納歲歉則許之倚征自然理得其中民知所措何以言之民生於利亦猶魚生於水也民困於利又如水涸於魚也願更生於讜議別布新條當生民既庶之時是求理酌中之際天下幸甚海內幸甚臣所謂綸旨稍頻者臣嘗讀揚子法言曰聖人之道猶日中又嘗覽太公六韜曰聖人之道猶

龍首龍首能高視而遠聽日中謂融明而燭幽是知君  
有居上之威儀臣有奉上之職業君道務簡簡則號令  
審而人易從臣道務勤勤則職業脩而事無壅臣伏見  
陛下憂民太過視事太勤每日早於崇德殿受百僚之  
朝至日午於講武殿視萬幾之事或進呈甲仗或揀閱  
軍人或躬問縲囚或親觀戰馬自甌而進者或詳其詞  
理搗鼓以聞者或徇彼冤誣皆金口言詞人人省問天  
心揆度一一區分有以見陛下勞萬幾之神自此見臣

下虧事君之職況今四方無事多壘盡平何以勞陛下  
如此太勤何以使三公因此無愧蓋陛下慮四聰或有  
所未達萬幾或有所未知文王之心遂乾乾而夕惕成  
湯之意貴孜孜於日新然陛下何不移此勤勞於求賢  
何不改此精專於選士諫官則置之左右御史即委以  
糾彈給事中當材者許之封駁詔令起居郎有文者命  
之紀錄言動百職如是各舉其業千官如是各得其人  
則何憂事不允釐何慮民不受賜今有司指揮多以劄

子取聖旨官負注擬必須引見聽敕裁事若允當則既由宸衷事若未當則亦歸睿斷如此皆勞天聽安用有司致陛下視事太勤憂民太過況宮闈乃尊嚴之地軒墀列清切之班可以延佇賢良詢求理道豈宜使押來囚繫或病患軍人或虛詞越訴之徒或僥倖希恩之輩引之便殿得面天顏陛下則隨事指揮臨時予奪其間有驟承顧問上懼天威或偶有敷陳稍愜聖旨怯懦齷訥者口雖奏而未盡其心姦詐辨詞者言雖當而未必

有理陛下或賜之恩澤或寘以刑名然睿鑑周通出令固無於枉濫而帝庭清肅終朝豈稱於喧囂加以條理事宜或傷頻併施行詔敕遂至稠重禮曰王言如絲其出如綸王言如綸其出如綽喻其以近及遠漸光大於萬方以言訓人可常行於百代簡而且要人則易從繁而又難人則易犯書曰臨下以簡又曰御衆以寬御衆不以寬則獲罪者多臨下不以簡則從令者少況帝王有常道禁令有常程施令貴乎必行設禁貴乎必止若

令之無節奉而行之者必難禁之無時遵而止之者亦寡臣所謂網利太密既如彼給音稍頻又如此願陛下寬臣敢言之罪察而審之望陛下聽臣敢諫之言擇而行之臣復有未諭聖意之事三又有奏請可行之事二未諭者今內職諸司各有公廨禁林近侍各有本廨中書是宰相職事之堂相府是陛下優賢之地今則於中書外廡置磨勘一司較朝臣功過之有無審州郡勞能之虛實聽言是職本屬考功豈考功之職不脩而磨勘



之名互出殊非雅稱深損大綱此臣所謂未諭聖意之事者一也其次御史臺本不禁人今為繫囚之所大理寺舊來置獄今為檢格之司授人之職本貴當材鞠獄以情者自然無濫或諸侯有大過或百姓有深冤乃命臺官委為制使憲府之風規自別刑曹之按鞠無疑今則或撾鼓聞天虛詞詰闕多差殿直承旨使為制勘使臣殊非理獄之才驟委鞠人之罪其間有未明推勘因致淹延或未曉刑章妄加深刻既臨以制書之命寘乎

縲紲之中上畏嚴威誰敢拒捍及當錄問皆伏款詞雖  
罪致徒流必該申奏按既圓備即據施行豈無陷於非  
辜豈無失於有罪虧陛下慈仁之旨損朝廷欽恤之恩  
此臣所謂未諭聖意之事者二也臣每讀史書至於文  
集或匹婦有廉正之節野人有孝悌之風尚旌彼門閭  
或賜之粟帛將以勵澆漓之俗亦以行風教之規脩身  
者由此彰名尚義者因茲立節今國家官僚遠官不得  
般家父母云亡不得離任墨纒視事寧安孝子之心明

詔未行深損聖人之教此臣所謂未諭聖意者三也昔漢文在位稱為刑措歲終斷獄者三十此蓋民安其業乃無咎於刑章物失其宜必自罹於天枉是以聖人見一物失宜則必加惻隱知一夫失所則必動哀矜御一衣思天下女工之勤嘗一膳思天下農夫之苦故尚書曰不敢侮鰥寡周易曰信及豚魚豚魚至微信猶能及鰥寡至賤侮不敢加有以見聖人用心無微不至聖人施惠無所不均今河朔數州衙前軍將應宣命配來之

者多江南兩浙之人雖曾有敕文許令自便然各無去  
着猶係職名其間有不請衣糧只望差使設有得該請  
受多是折支時寒無衣日餒無食老小相聚凍餓貧窮  
羈旅無圖咨嗟愁苦與其配之而無用孰若捨之而放  
歸此乃可言者一也今國家封疆甚廣州縣至多今錄  
闕負據資勞而遷授簿尉滿任按歲月以除移其間廉  
吏雖多抑亦貪夫不少貪者偶無彰露刑罰寧加廉者  
未有升聞旌酬弗及言乎賞勸似未精詳宜委諸州遍

令申奏州有幾縣縣有幾員奏其善者則不善者自彰  
奏其廉者則不廉者自顯或就加獎飭或聊與轉遷則  
廉能者既有所歸猥濫者寧無自愧揚清激濁實為致  
理之先易俗移風宜自親民之始此臣所謂可言者二  
也臣縷陳鄙見煩躋聖聽臣不任惶恐戰慄之至

淳化二年監察御史張觀乞體貌大臣簡略細務奏曰  
臣憑藉光寵備位風憲每遇百官起居日分立于庭司  
察不如儀者舉奏之因見陛下天慈優容多與近臣論

政德音往復頗亦煩勞至于有司職官承意將順簿書  
叢脞咸以上聞豈徒褻瀆至尊實以輕紊國體況帝王  
之道動則左史書之言則右史書之列於緗素垂為軌  
範不可不謹也若夫方今之急者匈奴未滅邊鄙猶聳  
陰陽未序倉廩猶虛淳朴未還奢風尚熾縣道未治逋  
逃尚多刑法未措禁令猶密墜典未復封祀猶闕凡此  
數者朝廷之急務也誠願陛下聽斷之暇宴息之餘體  
貌大臣與之商榷使沃心造膝極意論思則治體化源

何所不至臣又嘗讀唐史見貞觀初始置崇文館命學士者儒更直互進聽朝之隙則引入內殿講論文義商確時政或日旰忘倦或宵分始罷書諸信史垂為不朽況陛下左右前後皆端士偉人幸望端拱凝旒回視反聽釋循常之務養浩然之氣深詔近位闡揚真風上為祖宗播無疆之休下為子孫建不拔之業自然成康文景不獨專美於昔時堯舜禹湯自可追蹤於今日與夫較量金穀剖析毫釐以有限之光陰役無涯之細務者

安可同年而語哉

真宗即位知代州柳開上言曰國家初業將四十年陛下紹二聖之祚精求至治若守舊規斯未盡善能立新法乃顯神機臣以益州稍靜望陛下選賢能以鎮之必須望重有威即羣小畏服又西鄙今雖歸明他日未可必保苟有翻覆須得人制禦若以契丹比議為患更深何者契丹則君臣久定蕃漢久分縱萌南顧之心亦須自有思慮西鄙積恨未泯貪心不悛其下猖狂競為兇



惡侵漁未必知足姑息未能感恩望常預備之以良將  
守其要害以厚賜足其貪婪以撫慰來其情以寬假息  
其念多命人使西入甘涼厚結其心為我聲援如有動  
靜使其掩蔽令彼有後顧之憂乃可制其輕動今甲兵  
雖衆不及太祖之時人人練習謀臣猛將則又懸殊是  
以比年西北屢遭侵擾養育則月費甚廣征戰則軍捷  
未聞誠願訓練禁戢使如往日行伍必求於勇敢指顧  
無縱於後先失律者悉誅獲功者必賞偏裨主將不威

嚴者去之聽斷之暇親臨殿庭更召貔虎使其擊刺馳驟以彰神武之盛臣又以宰相樞密朝廷大臣委之必無疑用之必至當銓總僚屬評品職官內則主管百司外則分治四海今京朝官則別置審官供奉殿直則別立三班刑部不令詳斷別立審刑宣徽一司舊屬樞密近年改制職掌甚多加倍置人事則依舊別無利害虛有變更臣欲望停審官三班復委中書樞密宣徽院銀臺司復歸樞密審刑院復歸刑部去其繁細省其頭目

又京府大都萬方軌則望仍舊貫選委親賢今皇族宗子悉多成長但令優逸無以試材宜委之外藩擇文武忠直之士為左右贊弼之任又天下州縣官吏不均或冗長至多或歲年久闕欲望縣四千戶已上選朝官知三千戶已上選京官知省去主簿令縣尉兼領其事自餘通判監軍巡檢監臨使臣並酌量省減免虛費於利祿仍均濟於職官又人情貪競時態輕浮雖骨肉之至親臨勢利而多變同僚之內多或不和伺隙則致于傾

危患難則全無相救仁義之風蕩然不復欲望明頒告諭各使改更庶厚化原永敦政本恭惟太祖神武太宗聖文光掩百王威加萬國無賢不用無事不知望陛下開豁聖懷如天如海可斷即斷合行即行愛惜忠直之臣體察姦諛之黨臣久塵著位寔荷恩寵辭狂理拙唯聖明恕之

比部員外郎刁衍上疏曰臣聞天下大器也羣生衆畜也治大器者執一以正其度保衆畜者齊化以臻其原

故聖人謂莫神於天莫富於地莫大於帝王又曰帝王  
乘地而總萬物以用人也則知萬乘之尊一人之位等  
天地之覆燾若日月之照臨可不慎思慮以安民繫慘  
舒而被物所以堯舜篤善道以垂化而民謂之所天桀  
紂懷凶德以害世而民謂之獨夫則君之於民善惡有  
如是之驗民之於君毀譽有如是之異陛下纂圖茲始  
布政惟新所宜上順天心下從人欲進善以去惡避毀  
而來譽遵唐虞之治斥辛癸之亂私賞無及於小人私

罰無及於君子任賢勿貳去邪勿疑開諫諍之門塞讒  
佞之口愛而知其惡憎而知其善無以春秋鼎盛而耽  
於逸游無以血氣方剛而惑於聲色若太祖之勤儉若  
太宗之惠慈答天地敷錫之意保祖宗艱難之業則周  
成漢文三宗之美不可同年而議擬也

咸平四年知全州陳彭年答詔五事曰臣准詔在朝文  
武百官舉行轉對在外羣臣各許上章奏事者此陛下  
思納昌言以安庶彙之意也臣雖至愚切期塞詔伏惟

明睿少賜裁察今之踐明庭獻封事者多述民間之常務殊非邦國之遠圖臣之所言則異於是臣聞重華之世伯禹叙其九州太甲之朝伊尹陳其一德武王受命訪洪範之九疇成王嗣興制周官之六典咸同古道以資化源伏惟陛下嗣二聖之丕基御千齡之大統羣臣進用百姓阜安誠當煥發洪猷彰明盛德增脩制度躬立憲章變霸俗於累朝復王風於往古使九夷荷其惠澤萬世仰其聲名之日也夫事有雖小而可以建大功

理有至近而可以為遠計者臣請言之其事有五一日  
置諫官二曰擇法吏三曰簡格令四曰省吏員五曰行  
公舉此五者實經世之要道致理之坦途也臣請縷言  
之夫置諫諍之官開獻替之路堯舜湯武所共然也何  
者以正直之臣忠信之士參立左右專奉箴規有事必  
言有闕必諫足以達四方之壅蔽資聖主之聰明今雖  
有諫官且無言責或出居外任或兼領餘司常箝口以  
自安少危言而替否是同虛器何補聖猷臣請依六典



負數置諫議大夫司諫正言並選孤立無黨忠直不欺  
言行相符名實相稱者為之俱以才授不以叙遷使其  
常立明庭專居諫省入觀朝政出聽輿辭或作事失中  
或出令未當或選舉無狀或獄訟有冤小則上章大則  
廷諍然後聖主察其所言可者從之否者罷之歲終以  
言事之多少為課最之高卑忠謹盡規者甄升依阿固  
位者懲責自然人皆竭節政必無邪臣下不敢偷安朝  
廷得以震肅矣又人命所繫在於法官官或非才人必

無告古者按大獄議大刑雖本於法律亦輔以經義故  
釋之定國之為廷尉則無寃人張湯趙禹之列九卿乃  
名酷吏國家重文學之選輕刑法之司故其屬僚未得  
盡善用忠恕之道則為曠官徇刻深之文乃名奉法唯  
格律而是守豈經義之能詳若是則囹圄何由空虚鈇  
鉞何由偃息臣請今後廷尉官屬或委所司謹加銓擇  
不拘資叙唯擢才能使其理一成之刑務於平允用三  
尺之法志在哀矜無以愛憎舞文無以高下希旨自然

民知恥格時洽和平又法令者國家之權衡生民之銜  
轡貴於簡易惡乎滋章久用則民知適從數變則人無  
所措近者陛下知制敕之頻降懼條科之太繁旋軫聖  
謨特令刪定既經歷之者皆是名臣則措置之間固皆  
合理而詔書頒下方及於踰年後敕施行又將為累百  
或刪去者重為條貫或已有者吏亦申明無益憲章徒  
繁簡牘且理遵畫一則史無以欺民令或頻更則人得  
以弄法損益之際豈不明哉古人有言利不十不變法

誠謂此也。況先朝求理之心，陛下繼明之志，詔令一出，夷夏同歡，縱少有闕文，亦無妨大體。豈煩改作一致多門？臣請今後有上封言事，請變格法者，非有大益，毋改舊章。庶使號令愈明，刑辟漸措。又理世之端，審官為本。審官之道，用賢為先，不在具負，但期得俊。故曰：官不必備，惟其人。又曰：省事不如省官。今國家州郡至廣，官負太多，無益。公方空蠹國用，使有才者莫盡其力，不肖者得容其姦。請以臣所親經證其利害。臣前任蘇州通判。

日知州喬維岳疾病獨臣與判官崔端任其事次壽州  
通判日知州喬維岳喪亡支使甘鴻漸差出獨臣與推  
官陸文偉同官此時區分獄訟決遣文書皆得及期亦  
無闕事即今蘇州知州通判外有職事官三員壽州知  
州通判外有職事官四員官員既衆事分益煩增將吏  
之衙參添簿書之壅滯又臣本州洵陽縣計戶一千一  
百有官三員漢陰縣計主戶六百有官二員率皆人戶  
彫踈路岐荒僻詞訟絕少租稅甚微徒使安閒固無勤



績臣每見知郡推官軍監判官並名初等職事然有名雖知郡而事並藩方額是軍監而務多州府或當要道或在邊庭其間知郡則有推官而闕判官軍監則有判官而無通判監當錢穀詳斷刑名凡所責成莫非繁劇然其請受少於判司勞役不均賢愚共見臣請特選明幹朝臣與諸路轉運使相度管內州縣有公事簡少官屬過多處並量減省所減之俸依司理司法參軍例添給初等職官是則冗長之處既以減負要用之官又各

加俸自然官無虛設人皆竭誠創此新規益光至理又為邦之道莫切於求賢求賢之方莫先於公舉然隄防不峻則濫進之路興憲綱稍嚴則明敷之典廢期臻多士共振宏綱臣請依唐朝故事新授常參官朝謝日並進狀舉官自代各隨所長具言其狀或以文學或以吏能或以強明或以清白務在撫實不許飾詞儻所諳知無避親黨既經御覽即付宰司俟其年終具名條奏在外者委諸路轉運使在京者委本司長官更詳其能以

驗所舉如薦揚既數採聽非虛即為量才各加進用其  
後或不脩操行故瀆彛章則舉主依法科刑以懲謬舉  
或政績殊異課最有加則舉主隨事旌酬以褒進善賞  
罰既信清濁自明蓋採羣議則人無以私有常規則衆  
皆知勸清源正本其在於茲臣又伏見唐太宗常召公  
卿諮詢理體羣臣多拘近俗莫有遠謀唯獨魏徵請行  
王道太宗既從其議果致太平中華則外戶不扃四夷  
則重譯來貢艱難屢作而締創益新豈非盛德在人餘



慶及後所致歟國家功成理定遠肅邇安萬景宅心九  
夷拭目以陛下之聖德跨越古先誠宜鄙晉魏而不談  
小高光而獨出行清淨神明之化恢仁義慈儉之風然  
後舞干羽以為甲兵畫衣冠而為刑辟坐明堂而朝萬  
國登岱岳而禮百神則天下之民無聲而應海外之俗  
不召自來矣

咸平五年河陽節度判官張知白疏曰臣聞創王業期  
於無窮者必政事為基是以王業盛者其政事必經久

可取遠大可法然後速見治平之運竊以古今之言事者鮮不以防邊為急務多舉西北二隅攻守之事以獻方略由是竒兵之謀紛然競起夫五行之中金為兵以五事配之則金為義兵之為用實不可去也乃知言弭兵者罪莫大焉夫外商者亦天地之一氣耳其性無常邊方殊俗與中國絕異是以史籍所載京師為陽而諸夏為陰蓋取諸內外之義也夫陽主生物陰主殺物故知四夷擾邊不足異也在制之有道爾又和樂為陽愁

苦為陰王者必先內和人心而後制四夷此崇陽抑陰之義也臣伏見去春大雪今夏暴雨稽洪範之書則繫乎咎惡之文伏惟陛下自即大位日謹一日而復溫厚恭肅祇畏勤儉討論方策思廣治道聖德無缺則咎惡何從而起豈非政令之間有不便於天時者乎今夫春者發生之月也可生而不可殺也國家每歲春夏將交之時禁止採捕是仁及鳥獸今建寅之月三元之始孟夏乃是正陽之月況正律所載有秋分已前不決死罪

之制月令當春則曰無肆掠不可以陰政犯陽又曰宜  
行仁而不可以舉義事及夏則曰挺重囚出輕繫並無  
決死之文唐朝悉依此制若罪在十惡尤為巨蠹者則  
決不待時自唐氏失馭政事多隳今刑統內唯存晉天  
福七年敕立春兩日不決死罪蓋以天福之間方為戰  
國天下生靈犯罪戾抵淫刑者不可勝紀殺戮之刑僅  
無虛日故不可全避春夏盛德之月止取其兩日以代  
兩季今天下每歲所決大辟至鮮一歲之中凡有二十

四氣每歲各主十五日臣以為天下列郡每歲所決死罪雖不可禁春夏兩季亦可於立春立夏氣至之時各禁十五日以應一孟之節全發生之陽氣若罪在十惡決不待時者亦可改斬為絞以免流血之刑自餘雜犯死罪者若有已斷具獄可取半月外行決其邊防屯兵之地以軍法從事者不在此限又按禮經季夏中氣之後十五日不可以興土功為土將用事氣欲靜也請詔天下每歲起季夏中氣至立秋節半月內非邊陲防警

捍敵浚城及脩治隄防以禦水害餘並不得起創土功  
其整葺頽頹者不在此限臣又聞周禮六官其一曰秋  
官主刑又月令孟秋中氣之後則命有司繕圜圜具桎  
梏斷薄刑決小罪秋分則申嚴百刑斬殺必當無留有  
罪無或枉撓此並順上天行肅殺之令也令使決獄多  
不拘於此時或在三春或當九夏雖勤恤庶獄慮有滯  
留其如未順四時之令也欲望自今除盛夏仍舊降詔  
恤刑外每歲自孟秋中氣之後秋分前遴選周行分道

決獄如此則順天行刑而又四方之風謠因之得以知  
列郡之條網因之得以振且一歲之中必順令決獄與  
其行之於別季不若行之於此時又聞先王垂訓重德  
教而輕刑罰所以見王道盛也今法令之文大為時所  
推崇自中外由刑法而進者甚衆雖有循良之吏亦改  
節而務刑名也然則刑法者治世之具而不可以獨任  
必參之以德教然後可以言善治矣夫德教之大莫若  
孝悌若捨此而欲使民從化是猶釋舟楫而求濟於無

疆涯之津也故宜旌勸孝悌以厚風俗臣伏見朝廷明  
有詔命優恤孤窮無告之民令異其姓名別為一簿每  
遇有科徭賦斂則令去重就輕蠲勞為逸斯則蘇疲羸  
之一術也其如官吏鮮能奉行成制鄉縣之內因而別  
致慘舒若令佐盡得其人則孤窮無告之民皆得上簿  
不得其人則委之人吏責自鄉胥徇私任情移易貧富  
嗷嗷之民誰敢吐一言以伸訴必至於委棄溝壑是故  
將欲興禮義先在舒民心將欲舒民心先在均貧富將



欲均貧富先在正簿書養民之道郡踈而縣親故知百姓之長不可不精採擇蓋列郡之牧數至少而睿鑒可以周知宰序之任官至卑而朝廷難以徧察夫親民之官廉而不明者則失於馭下明而不廉者則傷於徇私必待廉明兼備中和在躬者然後可用是故備其位者則多中乎選者彌少邦國至大也庶官至衆也有人而置諸散地未可知也當其位而不使盡其心亦未可知也臣是以夙夜為國家思求人之術宜歷選周行經公

舉者而用之使先蒞大邑試其政事期年之間較其成績苟能正其簿書均其戶籍而孤窮之民得庇於上然後酬之以不次之恩臣又聞聖人居守文之運者將清化源在乎正儒術古之學者其事簡而有限其道精而有益今之學者其書無涯其道非一是故學彌多性彌亂至於經史子集其帙殆萬在於前者悉謂之古法在於編者悉謂之古書殊不知法有可法不可法也書有可傳不可傳也若盡使知之則可謂勞而少功博而寡

要當年不能究其學累世不能窮其業今進士之科大  
為時所進用其選也殊其待也厚進士之學者經史子  
集也有司之取者詩賦策論也故就試者懼其題之不  
曉詞之不明唯恐其學之不博記之不廣是故五常六  
藝之意不遑探討其所習泛濫而無著非徒不得專一  
又使害生其中何謂其然且羣書之中真偽相半亂聖  
人之微言者既多背大道之宗旨者非一若使習而成  
功得不揉淳粹之性蕩中正之氣其為吏也安能分挈

治柄使教令必行哉中庸曰率性之謂道脩道之謂教孔子曰性相近也習相遠也是知為儒不可不重其所習董仲舒曰春秋大一統者天地之常經古今之通誼今師異道人異論百家殊方指意不同是以上無以持一統法制數變下不知所守此仲舒議漢之失引春秋大一統之說言諸侯統於天子不得自尊亦猶百家之說不得與聖教並進懼乎亂皇王之大道也今之世望漢之世其章句之學彌盛而異端之書又滋多乎數倍

矣安可不定其成制哉況夫儒者之術不以廣記隱奧  
為博學不以善攻竒巧為能文若使明行政令大立程  
式每至命題考試不必使出於典籍外叅以正史至于  
諸子之書必須輔於經合於道者取之過此並斥而不  
用然後先策論後詩賦責治道之大體捨聲病之小疵  
如是則使夫進士之流知其所習之書簡而有限知其  
所學之文正而有要不施禁防而非聖人之書自委棄  
於世矣不加賞典而化成之文自興行於世矣

真宗時右正言夏竦上奏曰臣聞易曰堯舜垂衣裳而天下治語曰無為而治者其舜乎詩曰不識不知順帝之則皆非謂陰拱黃屋不親庶政納進熟之計受蒙成之福蓋言聖人勞於求賢逸於得士左右前後股肱耳目皆任循良一人虛心以感天下則可以無為矣夫天者君道也四時者臣道也君道清明以象天臣當生殺以象四時仲尼曰天何言哉四時行焉百物生焉古先聖王靡不由此國家中外清謐朝廷肅雍陛下親視萬

機勞神日昃至有論報刑徒簡稽卒伍皆抵軒陛寔煩  
清問臣聞百官承式各有司存正則有賞濫則有罰但  
令各守條章豈皆取必於上若陛下英睿神聖無得而  
量至於耳目視聽固亦有限日出臨朝表奏雲集決其  
大綱奮其宸斷猶不暇給況親其委細勞其聖躬臣切  
恐違上事宗廟下撫億兆之意願陛下選任賢達責成  
兇事應論罪閔卒之比自非國家大計理干政教者稍  
委之所貴庶政簡能符合太一宸體逸豫永享萬壽是

則塵露之微少裨萬一

仁宗天聖三年大理寺丞范仲淹上疏曰臣聞巧言者無犯而易進直言者有犯而難立然則直言之士千古謂之忠巧言之人千古謂之佞今臣勉思藥石切犯雷霆不遵易進之塗而居難立之地者欲傾臣節以報國恩恥佞人之名慕忠臣之節感激而發萬死無恨況臣之所言皆聖朝當行之事而未知行之者諒有以也聖人之心豈不至此蓋當乎一日萬機未暇餘論大臣之



心豈不至此蓋懼乎上疑下謗未克果行臣請言之以發聖慮臣聞國之文章應於風俗風俗厚薄見乎文章是故觀虞夏之書足以明帝王之道覽南朝之文足以知衰靡之化故聖人之理天下也文弊則救之以質質弊則救之以文質弊而不救則晦而不彰文弊而不救則華而將落前代之季不能自救以至於大亂乃有來者起而救之故文章之薄則為君子之憂風化之壞則為來者之資唯聖帝明王之相救在乎已不在乎人易

曰窮則變變則通通則久亦此之謂也伏望聖慈與大臣議文章之道師虞夏之風況我聖朝千載之會惜乎不追三代之高而尚六朝之細然文章之列何代無人蓋時之所尚何能獨變大君有命孰不風從可敦論詞臣興復古道更延博雅之士布於臺閣以救斯文之薄而厚其風化也天下幸甚臣又聞聖人之有天下也文經之武緯之此二道者天下之大柄也昔諸侯暴武之時孔子曰俎豆之事則嘗聞之聖人救之以文也及夾

谷之會孔子則曰有文事者必有武備請設左右司馬  
此聖人濟之以武也文武之道相濟而行不可斯須而  
去焉唐明皇之時太平日久人不知戰國不慮危大寇  
犯關勢如瓦解此失武之備也經曰禍兮福所倚福兮  
禍所伏又曰防之於未亂聖人當福而知禍在治而防  
亂故善安身者在康寧之時不謂終無疾病於是有節  
宣方藥之備焉安國者當太平之時不謂終無危亂於  
是有教化經略之備焉我國家文經武緯天下大定自

真宗皇帝之初猶有舊將舊兵多經戰陣四夷之患足以禦防今天下休兵餘二十載昔之戰者今已老矣少者未知戰爭之事人不知戰國不慮危豈聖人之意哉而況守在四夷不可不慮古來和好鮮克始終唐陸贄議云邊方殊俗輾轉無常深而多防狡而多計威之不悟撫之不懷雖或時有盛衰大抵常為邊患屬方靖中夏未遑外虞因其乞盟遂許結好加恩降禮有欲無違而乃邀求浸多翻覆不定託因細事嘖有煩言猜矯多

端其斯可驗此唐人之至論也今自京至邊並無關險其或恩信不守釁端忽作戎馬一縱信宿千里若邊少名將懼而不守或守而不戰或戰而無功再叩澶淵豈必尋好未知果有幾將可代長城伏望聖慈鑒明皇之前轍察陸贄之讜議與大臣論武於朝以保天下先命大臣密舉忠義有謀之人授以方略委之邊任次命武臣密舉壯勇出羣之士試以武事遷其等差壯士蒙知必懷報効列於邊塞足備非常其或自謂無虞不欲生

事輕長世之策苟一時之安邊患忽來人情大駭自古  
兵不得帥魚肉無殊乃於倉卒戰鬥之間拔卒為將豺  
狼競進真偽交馳此五代之前鑒也至於塵埃之間豈  
無壯士宜復唐之武舉則英雄之輩願在其中此聖人  
居安慮危之備備而無用國家之福也惟聖意詳之臣  
又聞先王建官共理天下必以賢俊授任不以爵祿為  
恩故百僚師師各揚其職上不輕授下不冒進此設官  
之大端也我國家累聖求理而致太平大約紀綱法象

唐室以臣觀之宜法唐興之時不宜法唐衰之後唐興之時特開館閣以待賢俊得學士十八人聲滿天下此文皇養將相之材以論道經邦而成大化也暨至中興往往得人唐衰之後此選不盛我朝崇尚館閣目為清華相輔之材多由此選三館清密古謂登瀛近歲遷出內庭逼居坊陌非唐所謂集仙之館也又其間校讐之職或不由科第以恩而除限以歲年漸至清顯輕十八學士之選恐非文皇養將相之材之意也伏望聖慈與

大臣議其可否重為制度以法唐興之時而延廊廟之  
器此國家之大美也又諫官御史耳目之司不諱之朝  
宜有賞勸自陛下臨政以來未聞旌一諫負賞一御史  
若言而無補是選之不精言而有補豈賞之不行徒使  
犯顏者危緘口者安以集藥石為虛言以陳絲髮為供  
職三載之後進退雷同臣恐天下竊議朝廷言路未廣  
忠臣未勸將令諫官御史之徒尸素於朝非國家之福  
也惟聖意詳之又聞先王義重君臣賞延于世大勲之



後立賢為嗣餘子則以才自調不使混淆而後大防一  
隲頽波千載凡居近位歲進子孫簪紱盈門冠蓋塞路  
賢與不肖例升京朝謂之賞延無乃太甚此必前代君  
危臣僭之際務相姑息因為典故以至於斯又百司之  
人本避鄉役不踰數歲例與出官莫非貪忍之徒絕異  
孝廉之舉使親民政其弊如何開此二途歲取百數無  
所不有實累王風恐非任官惟賢之體也人避衆怨不  
敢上言遂令仕路紛紜祿位填委文武官吏待闕踰年

貪者益礪其爪牙廉者悉困於寒餓徒於禮闈之內增其艱難壯士惜年數歲一舉廼相奔競至有訟爭而況脩辭者不求大材明經者不問大旨師道既廢文風益澆詔令雖繁何以戒勸士無廉遜職此之由其源未澄欲波之清臣未之信也儻國家不思改作因循其弊官亂於上風壞於下非國家之福也儻為長久之策則願與大臣特新其議澄清此源不以謗議為嫌當以治亂為意此國家之福也惟聖意詳之臣間以德服人天下

欣戴以力服人天下怨望堯舜以德則人愛君如父母  
秦以力則人視君如仇讐是故御天下者德可憑而力  
不可恃也伏惟皇太后陛下皇帝陛下日崇聖德以永  
服天下之心若夫敦好生之志推不忍之心薄於典刑  
厚於惻隱在物祝網於民泣辜常戒百官勿為苛酷示  
天下之慈也唯聖人能之恥珠玉之玩罷組繡之貢焚  
晉武之雉裘出文皇之宮人少度僧尼不興土木示天  
下之儉也唯聖人能之雞鳴而起孜孜聽政每有餘暇

則召大臣講議文武訪問艱難此皇王之勤也唯聖人  
勉之貴賤親踈賞罰唯一有功者雖憎必賞有罪者雖  
愛必罰捨一心之私從萬人之望示天下之公也惟聖  
人行之自古帝王與佞臣治天下天下必亂與忠臣治  
天下天下必安然則忠臣骨鯁而易踈佞臣柔順而易  
親柔順似忠多為美言骨鯁似強多為直諫美言者得  
進則佞人滿朝直言者見踈則忠臣避世二者進退何  
以辨之但日間美言則知佞臣未去此國家之可憂也

日聞直諫則知忠臣左右此國家之可喜也伏惟聖明不可不察自古王者外防夷狄內防姦邪夷狄侵國姦邪敗德國侵則害及黎庶德敗則禍起蕭牆乃知姦邪之凶甚於夷狄之患伏惟聖明常好正直以杜姦邪此致理之本也臣又聞聖人宅九重之深鎮萬國之望以靜制動以重為威如天之高如地之深使人不得容易而議也昨覲鑾駕順動稍頻恐非深居九重靜鎮萬方之意况進奏院報於天下下聞之恐損威重先朝以

御宇日深功成天下巡幸之費尚或諫止今繼明之始  
聖政方新宜加憂勤深防逸豫則人心大悅天道降康  
又比先帝功成之年未可輕為巡幸伏望聖慈再三詳  
覽每有順動必循典禮以服天下之望臣又聞人主納  
遠大之謀久而成王道納淺末之議久而成亂政方今  
聖人在上賢人在側取捨之際豈有未至然而刑法之  
吏言絲髮之重輕錢穀之司舉錙銖之利病則往往謂  
之急務響應而行或有言政教之源流議風俗之厚薄

陳聖賢之事業論文武之得失則往往謂之迂說廢而  
不行豈朝廷薄遠大之謀好淺末之議哉伏望聖慈納  
人之謀用人之議不以遠大為迂說不以淺末為急務  
則王道大成天下幸甚臣又聞聖人之至明也臨萬機  
之事而不敢獨斷聖人之至聰也納羣臣之言而不敢  
偏聽獨斷則千慮或失偏聽則衆心必離人心離則社  
稷危而不扶聖慮失則政教差而彌遠故設百官而不  
敢獨斷者懼一慮之失也開言路而不敢偏聽者懼衆

心之離也今聖政方新動思公共委任兩地出入萬機  
萬機之繁能無得失乃使羣臣上言以補其闕使上無  
蒙蔽下無壅塞有以見聖人之不獨斷也天下幸甚然  
而臣下上言密陳得失未可盡以為實而亦當深究其  
宜或務窺人短長或欲希旨上下動搖賞罰之柄離隔  
君臣之情似是而非言偽而辨雖聖鑒之下能無惑焉  
偶動宸衷無益王道似此密奏之類更望聖慈深加詳  
鑒與大臣議論可否然後施行儻密奏之言便以為實



內降處分一面施行則讒譖之人緣隙而進以訐為直以詐為忠使內外相疑政教不一非致理之本也古人有言曰為君難為臣不易者其在此乎伏惟聖明不可不察又自古親近小臣率多纖佞恃國恩寵為人階緣公議未行私請先至如此則人皆由徑政有多門伏望聖慈深為防慮以存至公之道也臣曲陋之人本無精識覽前王之得失究聖朝之取捨因敢罄而陳之伏望聖慈詳擇一二

慶歷中參知政事范仲淹又荅詔條陳十事疏曰伏奉  
手詔今來用韓琦范仲淹富弼皆是中外人望不次拔  
擢韓琦暫往陝西范仲淹富弼皆在兩地所宜盡心為  
國家諸事建明不得顧避兼章得象等同心憂國足得  
商量如有當世急務可以施行者並須條列聞奏副朕  
拔擢之意者臣智不逮人術不通古豈足以奉大對然  
臣蒙陛下不次之擢預聞政事又詔意丁寧臣戰汗惶  
怖曾不獲讓臣聞歷代之政久皆有弊弊而不救禍亂

必生何哉綱紀浸隳制度日削恩賞不節賦斂無度人情慘怨天禍暴起惟堯舜能通其變使民不倦易曰窮則變變則通通則久此言天下之理有所窮塞則思變通之道既能變通則成長久之業我國家革五代之亂富有四海垂八十年綱紀制度日削月侵官壅於下民困於外夷狄驕盛寇盜橫熾不可不更張以救之然則欲正其末必端其本欲清其流必清其源臣敢約前代帝王之道求今朝祖宗之烈采其可行者條奏願陛下

順天下之心力行此事庶幾法制有立綱紀再振則宗社靈長天下蒙福一日明黜陟臣觀書曰三載考績三考黜陟幽明然則堯舜之朝建官至少尚乃九載一遷必求成績而天下大化百世之後仰為帝範我祖宗朝文武百官皆無磨勘之例惟政能可旌者擢以不次無所稱者至老不遷故人自勵以求績效今文資三年一遷武職五年一遷謂之磨勘不限內外不問勞逸賢不肖並進此豈堯舜黜陟幽明之意耶假如庶僚中有

一賢於衆者理一郡縣領一務局思興利去害而有為也衆皆指為生事必嫉之沮之非之笑之稍有差失隨而擠陷故不肖者素滄尸祿安然而莫有為也雖愚暗鄙猥人莫齒之而三年一遷坐至卿監丞郎者歷歷皆是誰肯為陛下興公家之利救生民之病去政事之弊葺網紀之壞哉利而不興則國虛病而不救則民怨弊而不去則小人得志壞而不葺則王者失賢不肖渾淆請託僥倖遷易不已中外苟且百事廢隳生民久苦羣

盜漸起勞陛下旰食之憂者豈非官失其政而致其危耶至若在京百司金穀浩翰權勢子弟長為占據有虛食廩祿待闕一二年者暨臨事局挾以勢力豈肯恪恭其職使祖宗根本之地綱紀日隳故在京官司有一負闕則爭奪者數人其外任京朝官則有私居待闕動踰歲時往往到職之初便該磨勘一無勤效例蒙遷改此則人人因循不復奮勵之由也臣請特降詔書今後兩地臣僚有大功大善則特加爵命無大功大善更不非

時進秩其理狀循常而出者祇守本官不得更帶美職  
應京朝官在臺省館閣職任及在審刑大理寺開封府  
兩赤縣國子監諸王府并因保舉及選差監在京重難  
庫務者並須在任三周年即與磨勘若因陳乞并於中  
書審官院願在京差遣者與保舉選差不同並須勾當  
通計及五周年方得磨勘如此則權勢子弟肯就外任  
各知艱難亦有俊明之人因此樹立可以進用如今日  
已前受在京差遣已勾當者且依舊日年限磨勘其未

曾交割勾當却求外任者並聽其外任在京朝官到職  
勾當及三年者與磨勘內前任勾當年月日及公程日  
期并非因陳乞而移任在道月日及陞朝官在京朝請  
月日並令通計其遠官近地勞逸不同并在假待闕及  
公程外任滯或因公事非時移替在道月日委有司別  
行定奪聞奏如任內有私罪并公罪徒已上者至該磨  
勘日具情理輕重別取進止其庶僚中有高才異行多  
所薦論或異略嘉謀為上信納者自有特恩進改非磨



勘之可滯也又外任善政著聞有補風化或累訟之獄能辨寃沈或五次推勘人無翻訟或勸課農桑大獲美利或京城庫務能革大弊惜費鉅萬者仰本轄保明聞奏下尚書省集議為衆所許則列狀上聞並與改官不隔磨勘或有異同各以所執取旨出於聖斷仍請詔下審官院流內銓尚書考功應京朝官選人逐任得替明具較定考績結罪聞奏內有事狀猥濫并老疾愚昧之人不堪理民者別取進止已上磨勘考績條件該說不

盡者有司比類上聞如此則因循者拘考績之限特達者加不次之賞然後天下公家之利必興生民之病必救政事之弊必去綱紀之壞必葺人人自勸天下興治則前王之業祖宗之權復振於陛下之手矣其武臣磨勘年限委樞密院比附文資定奪聞奏二曰抑僥倖臣聞先王賞延于世諸侯有世子襲國公卿以德而任有襲爵者春秋譏之及漢之公卿有封爵而歿立一子為後者未聞餘子皆有爵命其次寵待大臣賜一子官者

有之未聞每歲有自薦其子弟者祖宗之朝亦不過此  
自真宗皇帝以太平之樂與臣下共慶恩意漸廣大兩  
省至知雜御史以上每遇南郊并聖節各奏子充京官  
少卿監奏一子充試銜其正郎帶職員外郎并諸路提  
點刑獄以上差遣者每遇南郊奏一子充齋郎其大兩  
省等官既奏得子充京官明異於庶僚大示區別復更  
每歲奏薦積成冗官假有任學士以上官經二十年者  
則一家兄弟子孫出京官二十人仍接次陞朝此濫進

之極也今百姓貧困冗官至多授任既輕政事不舉俸  
祿既廣刻剝不暇審官院常患充塞無闕可補臣請特  
降詔書今後兩府并兩省官等遇大禮奏許一子充京  
官如奏弟姪骨肉與試銜外每年聖節更不得陳乞如  
別有勲勞著聞中外非特賜一子官者繫自聖恩其轉  
運使及邊任文臣初除授後合奏得子弟身事者並候  
到任二年無遺闕方許陳乞如二年內非次移改者即  
許通計三年陳乞三司副使知雜御史少卿監以上並

同兩省遇大禮各奏薦子孫其正郎帶館職員外郎并  
省府推判官外任提調刑獄以上遇大禮合該奏薦子  
孫者須是在任及一周年方得陳乞已上有該說不盡  
者委有司比類聞奏如此則內外朝臣各務久於其職  
不為苟且之政兼抑躁動之心亦免子弟充塞銓曹與  
孤寒爭路輕忽郡縣使生民受弊其武臣入邊上差遣  
并大禮合奏薦子弟者乞下樞密院詳定比類聞奏又  
國家開文館延天下英才使之直祕庭覽羣書以待顧

問以養器業為大用之備今乃登進士高等者一任纔  
罷不以能否例得召試而補之兩府兩省子弟親戚不  
以賢不肖輒自陳乞館閣職事者亦得進補太宗皇帝  
建崇文院祕閣自書碑文重天下賢才也陛下當思祖  
宗之意不宜甚輕之臣請特降詔書今後進士三人內  
及等者一任迴日許進上教化經術文字十軸下兩制  
看詳作五等品第中第一第三等者即賜召試試又優  
等即補館閣職事兩府兩省子弟並不得陳乞館閣職

事及讀書之類御史臺隨時彈劾并諫院論奏如館閣  
闕人即委兩地舉文有古道才堪大用之士進名同舉  
并兩制列署表章仍上殿稱薦以充其職如此則館閣  
職事更不輕授足以起朝廷之風采紹祖宗之本意副  
陛下慎選矣三曰精貢舉臣謹按周禮卿大夫之職各  
教其所治三年一大比考其德行道藝乃獻賢能之書  
于王賢為有德行  
能為有道藝王再拜受之登于天府天府太廟  
之寶藏也蓋  
言王者舉賢能所以上安宗社故拜受其名藏于廟中

以重其事也。卿大夫之職廢既久矣。今諸道學校如得明師。尚可教人六經傳治國治人之道。而國家乃專以辭賦取進士。以墨義取諸科士。皆捨大方而趨小道。雖濟濟盈庭。求有才有識者。十無一二。況天下危困乏人。如此將何以救。在乎教以經濟之業。取以經濟之才。庶可以救其不逮。或謂救弊之術無乃後時。臣謂四海尚完。朝謀而夕行。庶乎可濟。安得晏然不救。坐俟其亂哉。臣請諸路州郡有學校處。奏舉通經有道之士。專於教。



授務在興行其取士之科即依賈昌朝等起請進士先策論而後詩賦諸科墨義之外更通經旨使人不專辭藻必明理道則天下講學必興浮薄知勸最為至要內歐陽脩蔡襄更乞逐場去留貴文卷少而考較精臣謂盡令逐場去留則恐舊人捍格不能創習策論亦不能旋通經旨皆憂棄遺別無進路臣請進士舊人三舉已上者先策論而後詩賦許將三場文卷通者互取其長兩舉初舉者皆是少年足以進學請逐場去留諸科中

有通經旨者至終場別問經旨十道如不能命辭而對則於知舉官前講說七通者為合格不會經旨者三舉已上即逐場所對墨義依自來通粗施行兩舉初舉者至於終場日須八通者為合格又外郡解發進士諸科人本鄉舉里選之式必先考其履行然後取以藝業今乃不求履行惟以詞藻墨義取之加用封彌不見姓字實非鄉里舉選之本意也又南省考試舉人一場試詩賦一場試策人皆精意盡其所能復考較日久實少

舛謬及御試之日詩賦文論共為一場既聲病所拘意思不遠或音韻中一字有差雖生平苦辛即時擯逐如音韻不失雖末學淺近俯拾科級既鄉舉之處不考履行又御試之日更拘聲病以此士之進退多言命運而不言行業明君在上固當使人以行業而進而乃言命運者是善惡不辨而歸諸天也豈國家之美事哉臣請重定外郡發解條約須是履行無惡藝業及等者方得解薦更不封彌試卷其南省考試之人已經本鄉詢考

履行却須封彌試卷精考藝業定奪等第進入御前選  
官覆考重定等第訖然後開看南省所定等第內合同  
姓名偶有高下者更不移改若等第不同者人數必少  
却加封彌更宣兩地參較然後御前放榜此為至當內  
三人已上即於高等人中選擇聖意宣放其考較進士  
以策論高詞賦次者為優等策論平詞賦優者為次等  
諸科經旨通者為優等墨義通者為次等已上進士諸  
科並以優等及第者放選注官次等及第者守本科選

限自唐以來及第人皆守選限國家以收復諸國郡邑  
乏官其新及第人權與放選注官今來選人壅塞宜有  
改革又足以勸學使其知聖人治身之道則國家得人  
百姓受賜四曰擇官長臣聞先王建侯以共理天下今  
之刺史縣令即古之諸侯一方舒慘百姓休戚實繫其  
人故歷代盛明之時必重此任今乃不問賢愚不較能  
否累以資考陞為方面懦弱者不能檢吏得以蠹民強  
幹者惟是近名率多害物邦國之本由此凋殘朝廷雖

至憂勤天下何以蘇息其轉運使并提點刑獄按察列  
城當得賢於衆者臣請特降詔書委中書樞密院且各  
選轉運使提點刑獄共十人大藩知州十人委兩制共  
舉知州十人三司副使判官同舉知州五人御史臺中  
丞知雜三院共舉知州五人開封知府推官共舉知州  
五人逐路轉運使提點刑獄各同舉知州五人知縣縣  
令並十人逐州知州通判同舉知縣縣令共二人得前  
件所舉之人舉主多者先次差補仍指揮審官院流內

銓今日以後所差知州知縣縣令共具合入人歷任功  
過舉主人數聞奏委中書看詳委得允當然後引對如  
此舉擇則諸道官吏庶幾得人為陛下愛惜百姓均其  
徭役寬於賦斂各獲安寧不召禍亂天下幸甚五曰均  
公田臣聞易曰天地養萬物聖人養賢以及萬民此言  
聖人養民之時必先養賢養賢之方必先厚祿厚祿然  
後可以責廉隅安職業也皇朝之初承五代亂離之後  
民庶凋弊時物至賤暨諸國收復天下郡縣之官少人

除補至有經五七年不替罷者或纔罷去便入見闕當  
物價至賤之時俸祿不輟士人之家無不自足咸平已  
後民庶漸繁時物遂貴入仕門多得官者衆至有得替  
守選一二年又授官待闕一二年者在天下物貴之後  
而俸祿不繼士人家鮮不窮窘男不得婚女不得嫁喪  
不得葬者比比有之復於守選待闕之日衣食不足貸  
債以苟朝夕到官之後必來見逼至有冒法受贓賒舉  
度日或不恥賈販與民爭利既非負罪之人不守名節



吏有姦賊而不敢發民有豪猾而不敢制姦吏豪民得以侵暴於是貧弱百姓理不得直寃不得訴徭役不均刑罰不正比屋受弊無可柰何由乎制祿之方有所未至真宗皇帝思深慮遠復前代職田之制使中常之士自可守節婚嫁以時喪葬以禮皆國恩也能守節者始可制姦賊之吏鎮豪猾之人法乃不私民則無枉近日屢有臣僚乞罷職田以其有不均之謗有侵民之害臣謂職田本欲養賢緣而侵民者有矣比之衣食不足壞

其名節不能奉法以直為枉以枉為直衆怨思亂而天下受弊豈止職田之害耶又自古常患百官重內而輕外唐外官月俸尤更豐足簿尉俸錢尚二十貫今窘於財用未暇增復臣請兩地同議外官職田有不均者均之有未給者給之使其衣食得足婚嫁喪葬之禮不廢然後可以責其廉節督其善政有不法者可廢可誅且使英俊之流樂於為郡為邑之任則百姓受賜又將來升擢多得曾經郡縣之人深悉民隱亦致化之本也惟

聖慈深察天下幸甚六曰厚農桑臣觀書曰德惟善政  
政在養民此言聖人之德惟在善政善政之要惟在養  
民養民之政必先務農農政既脩則衣食足衣食足則  
愛膚體愛膚體則畏刑罰畏刑罰則寇盜自息禍亂不  
興是聖人之德發於善政天下之化起於農畝故詩有  
七月之篇陳王業也今國家不務農桑粟帛常貴江浙  
諸路歲糴米二百萬石其所糴之價與輦運之費每歲  
共用錢三百餘萬貫文又貧弱之民困於賦斂歲伐桑

棗鬻而為薪勸課之方有名無實故粟帛常貴府庫日  
虛此而不謀將何以濟臣於天下農利之中粗舉二三  
以言之且如五代羣雄爭霸之時本國歲飢則乞糴於  
鄰國故各興農利自至豐足江南應有圩田每一圩方  
數十里如大城中有河渠外有門閘旱則開閘引江水  
之利潦則閉閘拒江水之害旱潦不及為農美利又浙  
西地卑常苦水沴雖有溝河可以通海惟時開導則潮  
泥不得而堙之雖有堤塘可以禦患惟時脩固則無摧

壞臣知蘇州日點檢簿書一州之田係出稅者三萬四千頃中稔之利每畝得米二石至三石計出米七百餘萬石東南每歲上供之數六百萬石乃一州所出臣詢訪高年則云曩時兩浙未歸朝廷蘇州有營田軍四都共七八千人專為田事導河築堤以減水患于時民間錢五十文糴白米一石自皇朝一統江南不稔則取之浙右浙右不稔則取之淮南故慢於農政不復修舉江南圩田浙西河塘大半隳廢失東南之大利今江浙之

米石不下六七百文足至一貫文省比於當時其貴十倍而民不得不困國不得不虛矣又京東西路有旱澇積潦之處早年國家特令開決之後水患大減今罷役數年漸已堙塞復將為患臣請每歲之秋降勅下諸路轉運司令轄下州軍吏民各言農桑之間可興之利可去之害或合開河渠或築堤堰陂塘之類並委本州軍選官計定工料每歲於二月間興役半月而罷仍具功績聞奏如此不絕數年之間農利大興下少飢歲上無

貴糴則東南歲糴輦運之費大可減省其勸課之法宜  
選官討論古制取其簡約易從之術頒賜諸路轉運使  
及面賜一本付新授知州知縣縣令等此養民之致富  
國之本也七曰脩武備臣聞古者天子六軍以寧邦國  
唐初京師置十六將軍官屬亦六軍之義也諸道則開  
折衝果毅府五百七十四以儲兵伍每歲三時耕稼一  
時習武自貞觀至於開元百三十年戎臣兵伍無一逆  
亂至開元末聽匪人之言遂罷府兵唐衰兵伍皆市井

之徒無禮義之教無忠信之心驕蹇凶逆至于喪亡我祖宗以來罷諸侯權聚兵京師衣糧賞賜豐足經八十年矣雖已困生靈虛府庫而難於改作者所以重京師也今西北強梗邊備未徹京師衛兵多遠戍或有倉卒輦轂無備此大可憂也遠戍者防邊陲之患或緩急抽還則外禦不嚴戎狄進便可直趨闕輔新招者聚市井之輩而輕罵易動或財力一屈請給不充則必散為羣盜今生民已困無可誅求或連年凶飢將何以濟瞻



軍之策可不預圖若因循過時臣恐急難之際宗社可  
憂臣請密委兩地以京畿見在軍馬同議有無闕數如  
六軍未整須議置兵則請約唐之法先於畿內并近輔  
州府召募強壯之人充京畿衛士得五萬人以助正兵  
足為強盛使三時務農大省給贍之費一時教戰自可  
防虞外患其召募之法并将校次第並先密切定奪間  
奏此實強兵節財之要也候京畿近輔召募衛兵已成  
次第然後諸道倣此漸可施行聖慈留意八曰減徭役

臣聞漢光武建武六年六月詔曰夫張官置吏所以為  
人也今戶口耗少而縣官吏職所置尚繁今司隸州牧  
各實所部二府於是條奏并省四百餘縣天下至治臣  
又觀西京圖經唐會昌中河南府有戶一十九萬四千  
七百餘戶置二十縣今河南府主客戶七萬五千九百  
餘戶仍置一十九縣主戶五萬七百客  
戶二萬五千二百鞏縣七百戶偃  
師一千一百戶逐縣三等而堪役者不過百家而所供  
役人不下二百數新舊循環非鰥寡孤獨不能無役西

洛之民最為窮困臣請依後漢故事遣使先往西京併  
省諸邑為十縣其所廢之邑並改為鎮令本路舉文資  
一員董榷酤關征之利兼人煙公事所廢公人除歸農  
外有願居公門者送所存之邑其所在邑中役人却可  
減省歸農則兩不失所候西京併省稍成倫序則行於  
大名府然後遣使諸道依此施行仍先指揮諸道防團  
州已下有使州兩院者皆為一院公人願去者各放歸  
農職官廳可給本城兵士七人至十人者人力歸農其

鄉村者保地里近者亦令併合能併一保者管亦減役十餘戶但少徭役人自耕作可期富庶九曰覃恩信臣竊觀國家三年一郊天子齋戒袞冕謁見宗廟乃祀上帝大禮既成還御端門肆赦天下曰赦書日行五百里敢以赦前事言者以其罪罪之欲其王澤及物之速也如此今大赦每降天下歡呼一兩月間錢穀司存督責如舊桎梏老幼籍沒家產至於寬賦斂減徭役存恤孤貧振舉滯淹之事未嘗施行使天子及民之意盡成空

言有負聖心損傷和氣臣請特降詔書今後赦書內宣  
布恩澤有所施行而三司轉運司州縣不切遵稟者並  
從違制徒二年斷情重者當行刺配應天禧年以前天  
下欠負不問有無侵欺盜用並與除放違者仰御史臺  
提點刑獄司常切覺察糾劾無令壅遏臣又聞易曰先  
王以省方觀民設教故有巡狩之禮察諸侯善惡觀風  
俗厚薄此聖人順動之意今巡狩之禮不可復行民隱  
無窮天聽甚遠臣請降詔中書今後每遇南郊赦後精

選臣僚往諸路安撫察官吏能否求百姓疾苦使赦書中及民之事一一施行天下百姓莫不幸甚十曰重命令臣聞書曰慎乃出令令出惟行准律文諸被制書有所施行而違者徒二年失錯者杖一百又監臨主司受財而枉法者十五足絞蓋先王重其法令使無敢動搖將以行天下之政也今觀國家每降宣敕條貫煩而無信輕而弗稟上失其威下受其弊蓋由朝廷采百官起請率爾頒行既昧經常即時更改此煩而無信之驗矣

又海行條貫雖是故違皆從失坐全乖律意致壞大法  
此輕而弗稟之甚也臣請特降詔書今後百官起請條  
貫令中書樞密院看詳會議必可經久方得施行如事  
干刑名者更於審刑大理寺句明會法律官吏參詳起  
請之詞刪去繁冗裁為制敕然後頒行天下必期遵守  
其衝改條貫並令繳納免致錯亂誤有施行仍望別降  
敕命今後逐處當職官吏親被制書及到職後所受條  
貫敢故違者不以海行並從違制徒二年未到職已前

所降條貫失於檢用情非故違者並從本條失錯斷科杖一百餘人犯海行條貫不指定違制刑名者並從失坐若條貫差失於事有害逐處長吏別見機會須至便宜而行者並須具緣由聞奏委中書樞密院詳察如合理道即與放罪仍更相度別從更改

歷代名臣奏議卷二十九